

Monsieur Fernand Etgen
Präsident vun der Chamber

Lëtzebuerg, de 29. September 2020

Här Präsident,

sou wéi den Artikel 83 vum Chambersreglement et virgesäit, bieden mir Iech, dës parlamentaresch Fro un den Här Educatiounsminister weiderzeleeden.

De Rekrutement vun Enseignanten huet sech déi lescht Joren iwwer als problematesch erweisen. 2017/2018 zum Beispill haten sech fir 291 oppe Plaze just 168 Kandidate gemellt. A senger Rentréespressekonferenz vun dësem Joer ass den SEW emol méi ob den akute Manktem un Enseignanten agaangen. Fir dëser Penurie entgéint ze wierke gouf 2018 de Beruff vum Enseignant fir sougenannt "Quereinsteiger" opgemaach. Fir d'Rentrée 2018/2019 goufen iwwer dës Wee 184 Kandidate rekrutéiert, vun deenen der am Laf vun dem selwechte Joer 5 sollen opgehale hunn, wéi aus enger Äntwert vum Här Minister op eng parlamentaresch Fro am Oktober 2019 ervir geet.

An deem Zesummenhang wollte mir dem Här Educatiounsminister dës Froe stellen:

- Wéi huet dës Zuel iwwer déi lescht Joren evoluéiert? Wéi vill Kandidaten hunn de Concours zum Enseignant gepackt, wéi vill befannen sech an der Carrière A2 als Chargé de cours a wéi vill hunn d'Grondschoul erëm verlooss?
- Wéi gesäit d'Evolutioun am Enseignantswiesen aus? Gëtt sech nees méi fir de Beruff interesséiert oder gëtt de Problem vum Manktem ëmmer méi akut? Wéi gesinn eventuell Äntwerten op dës Problem aus?
- 2018 hate 45% vun de "Quereinsteiger" e Bachelor am edukativen, psychologeschen oder soziale Beräich. Wéi gesäit de Background 2019 an 2020 aus? Besteet net e reelle Risiko fir d'Problemer vun der Schoul an de sozioedukative Beräich ze verlagere? Wéi ënnerscheeden sech d'Arbechtskonditiounen an deenen zwee Secteuren?

Mat déiwem Respekt,



Mars di Bartolomeo
Deputéierten



Francine Closener
Deputéiert

Äntwert vum Minister fir Educatioun, Kanner a Jugend op d'parlamentaresch Fro Nr. 2926 vun den honorabele Deputéierte Francine Closener a Mars Di Bartolomeo

Ad 1)

Am Kader vum Rekrutement vun de Kandidate mat engem Bachelor, deen a Relatioun mat engem vun den Objektiv vum Enseignement fondamental steet, goufen am Ganzen 230 nei Enseignanten an der Promotioun 2018 agestellt. Zum aktuellen Zäitpunkt hunn sech vun den 230 Kandidaten vun der Promotioun 2018 der 168 dem Concours gestallt, 48 schaffen der aktuell als Chargé de cours an der Carrière A2 an den ëffentleche Lëtzebuerger Grondschoulen a 14 Leit hunn am Laf vun de leschten zwee Joer demissionéiert.

Am Kader vum Rekrutement vun de Kandidate mat engem Bachelor, deen a Relatioun mat engem vun den Objektiv vum Enseignement fondamental steet, goufen am Ganzen 184 nei Enseignanten an der Promotioun 2019 agestellt. Zum aktuellen Zäitpunkt hunn sech vun den insgesamt 184 Kandidate vun der Promotioun 2019 der 124 dem Concours gestallt, 52 schaffen der aktuell als Chargé de cours an der Carrière A2 an den ëffentleche Lëtzebuerger Grondschoulen an 8 Leit hunn am Laf vum leschte Joer demissionéiert.

Et ass an dësem Kontext ze bemierken, datt vun de Kandidaten, déi demissionéiert hunn, der eng Partie bedéngt duerch hir Qualifikatioun, sprécht dem Ofschloss vun engem Masterstudium, een A1-Posten ugeholl hunn.

De Rekrutement vun de Kandidaten mat engem Bachelor, deen a Relatioun mat engem vun den Objektiv vum Enseignement fondamental steet, gouf fir dëst Joer nach net ofgeschloss. Aktuell ass virgesinn, 207 Kandidaten am Kader vun der Promotioun 2020 ze rekrutéieren.

Ad 2)

An deene leschte Jore goufe vill Efforten ënnerholl, fir nees méi Agenten fir de Beruff vum Enseignant an der Lëtzebuerger Grondschoul ze begeeschteren. Meng Servicer sinn all Joers (an dëst Joer online), op der Foire des Étudiants present, fir den aktuellen an den zukünftege Studenten déi eenzel Beruffer aus dem Beräich vun der Educatioun virzestellen. Des Weidere sinn eenzel Agenten am Kader vun Aktivitéiten, déi an de Lycéeën ugebuede goufen, intervenéiert, fir iwwert dës Wee déi zukünftege Studente fir de Beruff vum Enseignant ze begeeschteren.

Meng Gespréicher mat der Université du Luxembourg an de leschte Joren hunn dozou gefouert, datt d'Kapazitéit fir d'Formatioun zum Enseignant erhéicht goufen, esou datt elo méi Studenten hir Formatioun hei am Land kënnen maachen an sech deemno schonn am Kader vun hirer Grondausbildung mat de spezifesche Besoinen vun der Lëtzebuerger Schoulpopulatioun kënnen auserneesetzen.

Et ass och wichteg, de Jonken e Studium am Beräich *Sciences de l'éducation* an déi ënnerschiddlech Méiglechkeeten, déi sech mat esou engem Diplom erginn, nozebréngen. Nom Ofschloss vun engem Studium am Beräich vun den *Sciences de l'éducation* ass net nëmme d'Ausübe vum classeschen Enseignantsberuff méiglech, mee am Laf vun der Carrière kënnen sech d'Enseignantë spezialiséieren, fir sech duerno berufflech an d'Richtung vun der *Prise en charge* vu Kanner mat spezifesche Besoinen, vun der Schoulentwécklung oder der Interventioun an enger Regionaldirektioun ze orientéieren.

Trotz den Efforten, déi vu menge Servicer ënnerholl ginn, kënnen am Kader vum Concours, deen den Accès an de Stage vum Enseignant-fonctionnaire erméiglecht, net all d'Poste besat ginn, esou datt de Rekrutement vun de Kandidate mat engem Bachelor, deen a Relatioun mat den Objektiv vum Enseignement fondamental steet och an den nächste Joren zum Droe wäert kommen. Et gëllt, dëse Modell ze evaluéieren, éiert d'Mesure am Joer 2023 ausleeft, an eventuell eng adequat Alternativ auszeschaffen.

Ad 3)

Fir 2019 sinn insgesamt 310 Enseignanten rekrutéiert ginn. Dëse Grupp setzt sech zesummen aus 159 Persounen, déi e Bachelor en sciences de l'éducation hunn an 151 Persounen, déi en aneren Ofschloss hunn. Dobäi ass ze bemierken, datt vill Absolvente mat Studien aus de Beräicher Pédagogik, Psychologie a Sozialwëssenschaften sech fir de Beruff vum Enseignant interesséieren. De wäitaus gréissten Deel vun de Persounen mat engem Ofschloss a Relatioun mat dem Enseignement fondamental ginn aus dësem Beräich rekrutéiert; et sinn der insgesamt 50.

Doriwwer eraus sinn 37 Persounen mat engem Ofschloss am Beräich vun de Sproochen, déi am Enseignement fondamental enseignéiert ginn, 17 Persounen mat engem Ofschloss an der Mathematik an Informatik an 13 Persounen notamment aus de Beräicher Sport a Konscht rekrutéiert ginn.

Fir 2020 goufe bis elo insgesamt 306 Enseignanten rekrutéiert. Dëse Grupp setzt sech zesummen aus 132 Persounen, déi e Bachelor en sciences de l'éducation hunn an 174 Persounen, déi en aneren Ofschloss hunn. 61 Persounen mat engem Ofschloss a Relatioun mat dem Enseignement fondamental ginn aus de Beräicher Pédagogik, Psychologie a Sozialwëssenschaften rekrutéiert.

Doriwwer eraus sinn 19 Persounen mat engem Ofschloss am Beräich vun de Sproochen, déi am Enseignement fondamental enseignéiert ginn, 31 Persounen mat engem Ofschloss an der Mathematik an Informatik an 63 Persounen notamment aus de Beräicher Sport an Konscht rekrutéiert ginn.

De Rekrutement vum Schouljoer 2020/2021 ass aktuell nach net ofgeschloss, deemno sinn dës Zuelen nach net definitiv.

Mir stellen allgemeng fest, datt d'Kandidaten mat Diplomer aus dem sozioedukative Beräich net iwwerrepresentéiert sinn par rapport zu de Kandidaten aus deenen aneren Beräicher, esou datt iwwer dee Wee prinzipiell kee Problem fir aner Secteuren geschaf gëtt.

Ech verweisen am Kader vun enger Beschreiwung vun den Aarbechtskonditiounen op de *Règlement grand-ducal modifié du 23 mars 2009 fixant le détail de la tâche des chargés de Cours, membres de la réserve de suppléants de l'enseignement fondamental*. An dësem Règlement ginn déi genau Aufgaben vun de Chargés de cours beschriwwen. Wat dat sozioedukatiivt Personal betrëfft, kann een, op Grond vun der Villfältegkeet vun de Berufsfelder (Member vun der ESEB, Mataarbechter an enger Maison relais oder an engem Internat, etc.), keng Verallgemengerung vun den Aarbechtskonditiounen maachen. Aus dësem Grond ass en direkte Verglach vun de Konditiounen tëscht deenen ënnerschiddlechen Berufsgruppen net méiglech.